

Dumonda da la fracziun da la PPS concernent il rinforz da la forza idraulica en il Grischun

Dapi quasi 111 onns vegn producida energia cun agid da la forza idraulica en noss chantun; e questa energia è segiramain in da noss exports ils pli attractivs. En las vals perifericas procuran la producziun d'energia ed ils lieus da producziun decentralas – ultra da plazzas da lavur e da plazzas da scolaziun – er per entradas fiscalas, e betg d'emblidar per entradas dals tschains d'aua, ch'èn schizunt d'ina impurtanza existenziala per bain inquala vischnanca.

Las mesiras da promoziun europeicas enormas gist en implants eroelectrics e fotovoltaiics han però deplorablamain per consequenza ch'i na pon betg vegnir realisadas cun gudogn investiziuns pli grondas en la forza idraulica cun ils pretschs d'energia dad oz.

Cun la Strategia d'energia 2050 da la Confederaziun, che prevesa tranter auter da desister d'ovras nuclearas, d'aventan accumulatur d'energia da lunga durada adina pli impurtants. Tenor signur Walter Sattinger da Swissgrid vegnan tals prest a mancar en l'entira Europa.

Tant pli surprendent è il fatg che – tenor la Repower – na vegn betg pli persequità vinavant il project Lagobianco, che fiss in tal accumulatur d'energia da lunga durada. Quai cun la motivaziun che la rentabilitad na saja betg dada e che ozendi na chattian tals projects nagin sustegn pli.

Deplorablamain è restà fitgà en la procedura d'approvaziun da la concessiun er il project Chlus, per la realisaziun dal qual i dovra enconuscentamain in grond sustegn finanziel da vart da la Confederaziun e da vart da la politica. Ils meds finanzials che stattan actualmain a disposiziun na tanschan deplorablamain lunschor betg. Tant pli surprendent è quai, perquai che quest project vegn acceptà er da las federaziuns per l'ambient, e perquai ch'el pudess eliminar la tematica da las midadas da la deflussiun en la Landquart.

En sia comunicaziun a las medias ed en ses fegl d'infurmaziun dals 03-04-2020 conferma il Cussegl federal almain che las valurs directivas ch'existan gia per engrondir la forza idraulica per l'onn 2035 duajan vegnir decleradas sco finamiras impegnativas. Ultra da quai duai ina finamira per l'onn 2050 vegnir integrada en la lescha.

Las sutsegnadras ed ils sutsegnaders tschentan en quest connex las suandantas dumondas:

1. È er la Regenza da l'avis che la forza idraulica tira plitost la curta en la nova Lescha d'energia, tant pli che tut las intervenziuns da l'ultim temp èn idas a favur da la fotovoltaiica?
2. En vista al fatg che la forza idraulica cun ses tschains d'aua è ina funtauna d'entradas considerabla per inquala vischnanca: Tge fa la Regenza per rinforzar la forza idraulica en noss chantun?
3. È il chantun Grischun pront da sustegnair las ovras idraulicas pitschnas indigenas en il senn da la Strategia d'energia 2050 medemamain en ina dimensiun cumparegliabla a quella da la fotovoltaiica (adattaziun dals meds da promoziun per il 01-01-2021) per che la rentabilitad da quest gener d'ovras electricas saja dada e per ch'i possian vegnir fatgas investiziuns?
4. Tras la Strategia d'energia 2050 e tras la legislaziun d'energia vegnan promovidas fermamain las novas energias regenerablas a favur d'ina applicaziun decentrala. L'utilisaziun da questas novas energias regenerablas ha la preferenza envers la forza idraulica indigena che vegn producida oz (merit order). Quai ha per consequenza ch'er las taxas da concessiun ed ils tschains d'aua a favur da las vischnancas vegnan a sa reducir. Tge fa il chantun cunter quai?
5. Tge tenuta ha la Regenza envers il fatg che quellas vischnancas ch'èn pertutgadas d'implants eroelectrics e fotovoltaiics professiunals, vegnan indemnissadas per questa producziun d'energia (p.ex. concessiun eroelectrica, concessiun solara)?
6. Tge fa la Regenza per promover projects d'engrondiment sco p.ex. Chlus u er Lagobianco? Surpiglia la Regenza qua ina rolla activa tar la Confederaziun?

Tavau, ils 9 da december 2020

Gort, Favre Accola, Koch, Brandenburger, Salis